



наведи телефон

Лүимә сәрипос

29.01.2026
№ 2 (1356)

www.khanty-yasang.ru

Основана 11 февраля 1989 года

E-mail: gazeta@khanty-yasang.ru



Г. Дунаева в әрүм хури

Тәл котиль этпост ханищтахтан мәньлат хөтпат хөтал 6лыс. Ты хурит Ханты-Мансийск үст ханищтахтан мәньлат агит ос тән ётаныл рүпитан нэг пöслым 6лэгыт. Агит «Тöрум Маа» музейн ялсыт. Ты урыл 12 лöпсыт ловиньтән.

**Ты
номерт
ловиньтән:**

Лёккарыт павлың
мир пусмалтым
яласэгыт

► 4

Хальүс район павланэ
хумыс 6лэгыт, тав
акваг уральтым
6ньщиянэ

► 6

Хүл алыщлан
мәхум рүпатаныл

► 7

Мәньлат порат
ханищтахтам
таланув акваг
номиянүв

► 9

Ханищтахтан
мәньлат хөтпат
ялпың хөтал

► 12

Варьёган павыл
6лупса

► 14

Хөнтыт порсум
пыгыт номнэ
мәгсыл касыл
6лыс

► 16

Лёккарыт павлың мир пусмалтым яласэгыт

Ты этпост «Профессиональный патология Центр» колт рүпитан лёккарыт ишхйпың утыл вәрим мәшинатыл округ янытыл мәнь павылквет өлнэ мәхум уральтаңкве минаясыт.

Лёккарытхүрум пиркә-та щирыл урхатасыт, тәл котиль этпост 15 хөталэт акват Сургутский районт рүпитаңкве ывылтахта-сыт. Өвлэттән Угут павылн өлнэ мир пусмалтаңкве ялсыт. Ты юи-пәлт Каю-ково ос Юган павлын ёх-таласыт.

Рётың юсвой этпос ывыл хөталныл ты лёкка-рыт Ханты-Мансийский районт мәнь павылт өлнэ мир пусмалтаңкве тах минёгыт.

Китыт пиркәта ыс тәл котиль этпос 15 щислал Хөнтаң районты рүпиты. Ты юи-пәлт лёккарыт Белоярский районт Нумто павылн тув ёхталёгыт. Тувыл Нижневартовский районт өлнэ павлың мәхум

уральтаңкве минёгыт.

Хүрмит пиркәта Халь-үс районны кётвес. Та районт лёккарыт 16 павлын тах хөиглэгыт. Өвлэт тән Няхшамвөл павыл мәхум уральтасыт, ты юи-пәлт Хулюмсүнт павылн ялсыт. Рётың юс-вой этпос 9 хөталэт тән Октябрьский районны минмыгтэгыт, 10 щислат Перегрёбный павылт рүпитаңкве патэгыт.

Лёккарыт яныгпөлэ этпос мус округ янытыл мәхум уральтым мәшинал яласаңкве патэгыт.

Яңк нәтнэ этпос ойгпан юи-пәлт кит нәиңхәпыг рүпитаңкве ыс аквата тәра ывылтахтэ. Ты элы-пәлт округув янытыл сәв тәл «Николай Пирогов» нәиң-



Ишхйпың мәт вим хүрә

хәп яласас. Ты тәлныл лильпи нәиңхәп «Святи-тель Лука» рүпитаңкве ывылтахты.

Өвлэт лёккарыт лильпи нәиңхәпыл Октябрьский район Большой Атлым павылн пүхталёгыт. Ты юи-пәлт лёккарыт Халь-үс районны минмыгтэгыт, яңк нәтнэ этпос 26-30 хөталыт сис Саранпә-вылт рүпитаңкве патэгыт. Лүпта этпос ывыл хөталэт Сүкырья павылныл өлнэ мәхум уральтыяныл. Ос аквата этпос 5-6 хөталыгт Кимкьясүй павылн минё-гыт. Ты кит мәнь павлыгт лёккарыт ывыл щёс мә-хум туи тах уральтаңкве патэгыт.

Мөлты тәл вәт сәграп-нал этпост Хальүс районт өлнэ нэ Руслан Кухарук, яныг кұшай, китыгласэ, манрыг нәиңхәпыт рү-питан лёккарыт Кимкья-сүй ос Сүкырья павылн мәхум пусмалтаңкве ат ёхталёгыт. Төнт округ яныг кұшай лавыс, 2026 тәлт «Святитель Лука» лильпи нәиңхәп рүпитаңкве ывылтахты, та порат лёк-карыт сәвнүв мәнь пав-лытын ялуңкве тах алы-мёгыт. Ос лавыс, ты мәнь павлыгт план-нэпакн вос хансавёг, лёккарыт тув мир пусмалтаңкве вос ялэгыт ос та павлың хөт-пат уральтэгыт.

Людмила ТЕТКИНА

Кәсың хөтпа алпитэ вәтихал вос уральтытэ

Няврам самын паттын ләваве: «Репродуктивная система человека». Нэ хөтпа алпи тйврёт няврам яныгман мәтэ, тувыл нэ манос хум хөтпа няврам тәлнэ мәтэ репродуктивный мәг ләвавет.

Кәсың хөтпа хунь мощ яныгнү-вёг ёмты, төнт ты мәнэ уш үнтха-туңкве патэгыт. Алпитэ пүстагыл ылы те, няврам самын паттын мәнэ ыс ёмас щирыл ылэгыт тах.

Таимәгыс мәхум алпияныл вәтихал вос уральтыяныл, ос мата-раныл агмыңыг ёмты те, лёккарыт палт вос минёгыт. Агм молях тәра-паттаве те, хөтпа акв та тәра пус-малтахтуңкве паты, тох агме элалы ат мины.

Яныгхөтпат олн ойттәл уральта-вет, тән туп пүльнищан вос ёхтэгыт. Кәсың элумхөлас прописка щирыл хоталь хансым ылы, өлнэ мәтэт пүльнищан вос ялы.

18-49 тәл яныт нэ хөтпата акушер-гинеколог лёккарын уральтавет.

18-49 тәл яныт хум хөтпат уролог лёккар палт вос минёгыт.

Хунь нэ манос хум хөтпа алпитэт няврам яныгман ос няврам самын паттын мәтэ агмыңыг ёмты, хоты лёккар палт минуңкве эри?

Репродуктолог лёккар агм тәра-патты, мәхум пусмалты, тувыл тән ётаныл потрами, хұлтыглы, ань пүстагыл өлнэ мәгыс хумус ылуң-кве эри, маныр тәңкве, та маныр. Ул вос пөльтахтэв, ащирма порат рёгыңыг вос масхатэв.

Репродуктолог лёккар коны-пал ты тәла торыг гинеколог, уролог, андролог, венеролог ос психолог лёккарыт рүпитэгыт.

Ляххал мәньщи ләтныг
Светлана РОМБАНДЕЕВА
толмашластэ

Яныг кўщаитн янытлавёсыт

Ляххал тотнэ мэхум вэрнэ рўпатаныл
мāгсыл тāl котиль этпос 13 щислат
Россия янытыл янытлавет, ялпың хōталаныл
рущ лātңыл «День печати» намаим блы.

Кāсың тāl мāн блнэ
мāвт ляххал тотнэ мэхум
халт **«Журналист года»**
нампa касыл вāрыглаве.
Юи-бвыл тāлыт тāн тāl
котиль этпос 13 щислат
нōх-патум мэхум нама-
ныл лāвавет.

Та хōталт округ яныг
кўщай **Руслан Кухарук**
сāвсыр газетат, телеви-
деният, ищхйпың лōп-
сың мāt рўпитан хōтпат
янытласанэ. Тав лāвыс:
*«Ляххал тотнэ хōтпат
ялпың хōталаныл кастыл
сāв ёмас, сымың лātңыл
лāвиянум. Мāн «День
печати» хōталт акван-
атхатсўв ос «Журналист
года – 2025» касылытнōх-
патум мэхум ань яныт-
ल्याнўв. Ты касыл 19 тāl
сыс вāрыглаве ос таи
ёмас, кāсың тālныл ты
вāрмалъ урыл сāвнум
мэхум вāгыт ос сāвнум
рўпатаныл кētэгыт. Мōлты
тāl сыс акв сōтыра арыг-
кем потрыт ос ляххалыт
тув ёхтысыт.*

Мирув блнэ тāрвитың
вāрмалит урыл нāн акваг
хансэгын, мāнавн потыр-
тэгын, тох мāн пуссын
аквѣт округувт блнэ

*мири нētэв ос блупсаныл
мощ кўпнитыг ёмты».*

2025 тāl ойгпам элы-
пāлт касылн 331 элум-
хōлас тāнки хансум пот-
раныл, пōслум кинаныл,
ляххаланыл кētсаныл.
Жюри-хōтпаг обществен-
ный организацият рўпи-
тан, мирн вāнэ хōтпат ос
сосса мэхум блсыт. Тāн
лāвсыт, кēтым потрыт
пуссын сака ёмашакв
хасвёсыт, кинаныл ёма-
шакв пōслувёсыт, тāн
халанылт щар мāk ёмас
потрыт, кинат пēрияңкве
тāрвитың блыс.

Ты юи-пāлт Руслан
Кухарук нōх-патум хōт-
пат диплом-нēпакыл ми-
санэ. Щар мāk яныг нам
«Журналист года-2025»
Светлана Круковская
вистэ.Тав «Югория» нампa
телеканалыт атхуйпов
арыгкем тāl корреспон-
дентыг рўпиты.

«Телевидение» нампa
номинацият **Максим
Щербаков** янытлавес.
«Радио» номинацият
Марина Мануйлова бвыл
места вис, «Интернет-
СМИ» - **Карина Дроздец-
кая** ос «Печатные изда-



Округ кўщай Р. Кухарук Т. Мерова янытлытэ

ния» нампa номинацият
Галина Батищева хансум
потре мāгсыл диплом-
нēпакыл майвес.

Мāньщи газетат рўпи-
тан нэ **Тамара Мерова**
«Родное слово» номина-
цият нōх-патыс. Тамара
Сергеевна сāв тāl ляххал
тотнэ хōтпаг рўпиты.
Касылын «Тāн наманыл
мири вāнэг вос ёмтэгыт»
газетат хансыглам потре
кēтыстэ.Тав Санкт-Пете-
бург ўст блнэ нэ Любовь
Юрьевна Попова ос А.И.
Герцен нампa лүймā
институтт ханищтахтан
āгит-пыгыт акв тēла щи-
рыл хумус рўпитаңкве
бвылтахтасыт, та урыл
хансыс.

Ты тāl «Родное сло-
во» номинациян мэхум
мāньщи ос ханты лātңыл
хансум 10 рўпатаныл
кētсаныл.

«Югра» нампa теле-
виденият рўпитан нэ
Татьяна Гордеева пōслум
кинатэ мāгсыл яныг
кўщаитн бс янытлавес.
Тав «Лучшая авторская
работа» номинацият нōх-
патыс. Татьяна ляххал
тотнэ хōтпаг хус арыгкем
тāl рўпиты ос сосса
мирыт ялпың хōталаныл,
блупсаныл, пēs йис вāр-
маляныл урыл кинат ак-
ваг пōслы.

Ты тāl мэхум 1043
хансум потраныл ос пōс-
лум кина-охсаныл ты
касылн кētсаныл. Жюри
хōтпат 23 номинацият
щар мāk ёмас 32 рўпата
пēриясыт. Ты касыл 2007
тāl пāсныл щēпитāлаве,
тот акваг сāвсыр лильпи
номинацият вāрыглавет.
Мōлты тāl «Год истори-
ческого наследия», «Год
защитника Отечества»
намаим блыс Победа
хōтал 80 тālэ тōвлыс. Ты
кастыл касылыт ос лиль-
пи номинацият вāрыгла-
вёсыт. Ляххал тотнэ хōт-
пат хōнтлам мэхум урыл
сāв потыр тув кētсыт.

Мāн, редакция рўпитан
мэхум, ты касылыт нōх-
патум хōтпат янытल्या-
нўв! Сāвнум ёмас, эрнэ
ляххал мирн вос тотэгыт,
рўпатаныл акваг щирыл
кāркамыг вос вāрияныл!



Р. Кухарук ос округ кўщайн янытлым мэхум

Людмила ТЕТКИНА

Хонтлын хөтпәт ос тән щәмьяныл нётмилыл вәравет

Ты этпос атхуйпловит хөталэт «Защитники Отечества» намба государственной фонд филиалыт кўшаиг рўпитан хум Игорь Илык ляххал тотнэ колн ёхталас. Ювле хультум тәлт округвныл хонтлын хөтпәтн ос тән щәмьяныл манырсыр нётмил вәрвес ос ань манарыл нётает, тав ты урыл потыртас.



И. Илык

Кўшай хум Игорь Илык лавме щирыл, «Защитники Отечества» намба хонтлын хөтпәтын нётмил вәрнэ фонд 2023 тәлт лўпта этпост овыл хөталт рўпататэ овылта-стэ. 2025 тәлт мәньюль этпост ты фонд иильпи яныг колн вәнтлыс. Ань адресэ Ханты-Мансийск ўс, Мира ўсхулы, 122 колт олы.

Тот хонтлын хөтпәтын акв хөтал сыс савсыр лёккарыт палт ликмўкве рёви. Мәхум тот савсыр вәрмалы щирыл хўлтыглавет. Эрнэ нэпакыт мўсхалыг щёпитан мағыс, матыр олн нётмил винэ мағыс нётает. Тот хонт хөтпәт мағыс каснэ колнак ос мот савсыр эрнэ тэлат щёпитым олэгыт. Ань ты хөталт округвт тамле нётмилыл вәрнэ нёллов сөтыра хөтпа олы.

Хонтлын мәныл юв ёхтум хөтпәт ос тән

пусмалтахтын мән ялнэ вәрмалы урыл китыглахтэгыт. Тән тот психологытн нётает. Ты коньпал фонд-колт ос мот савсыр вәрмалы щирыл нётмил вәраве.

Щар овлэт мак хонтлын мәныл юв ёхтын хөтпәт тән нётает. Тувыл хонтлын мāt порслым хөтпәт щәмьяныл нётмилыл вәравет. Ань ос хўрмит вәрмалы щирыл нётмил ёмтыс. Ты хонтлын мāt вәнэтәл хультум хөтпәт тән щәмьяныл ань ос нётуңкве патвёсыт.

Фонд рўпитанэтэ пәсныл, Ханты-Мансийск ўсн ос районуытн пуссын аквьёт сәтхуйплов сөтыра савит элумхөлас нётмил вөвнэ мағыс тув ёхталасыт. Ты хосыт

тумёт, тавён шар овлэт мируң мāt щәмьятэ ошнэ мағыс рўпата хонтуңкве эри.

Таимәгсыл шар мак овлэт ты вәрмалы щирыл яныг рўпата вәраве. Ты хосыт ювле хультум тәлт мән округвт сав хөтпа рўпатаңыг ёмтсыт. Тувыл ос ань фондыт кит элумхөлас ағмың-мосың хөтпәтн нётмил вәрим рўпитэг.

Игорь Илык лавыс:

– Төва хонтлын хумыт хунь юв ёхтэгыт, мируң мāt олмыгтэгыт, тәнки рўпата вәруңкве кәсащёгыт. Ты рўпатаныл тэлаг вос ёмтыс, мән ань «Мой бизнес» ос «Уполномоченный по защите прав предпринимателей» мәхум ёт акван-потыртахтасўв. Ты вәрмалы хосыт тәнки рўпата вәрнэ хөтпәт предприятияныл вәрнэ мағыс планыл хансавет, ос рўпатаныл овылтахтын мус уральтавет. Тәнки рўпата овылтан кәсың хөтпа манос щәмья палт ты тэла вәнэ элумхөлас паттаве. Ты элумхөлас овыл порат рўпататэ эрнэ щирыл вәрнэ мағыс хөтпа ханищтытэ ос хўлтыглытэ.

2025 тәл ойгпан порат хотьют ты программа щирыл ханищтахтас, тән кит млн савит субсидияолнытыл майвёсыт. Ты олнытыл тән тәнки рўпатаныл вәрнэ мағыс матыр эрнэ пормасыт ёвтсыт. Ты хөтпәт элалы акваг уральтанкве ос нётуңкве патает тах. Тамле ты эрнэ вәрмалы ань хонтлын мәныл юв ёхтум хөтпәт ос тән щәмьяныл мағыс вәраве.

Николай МЕРОВ

www.khanty-yasang.ru



«Защитники Отечества» кол, Ханты-Мансийск ўс


щәмьяныл савыңпәлэ ЖКХ ойтхатнэ вәрмалит, нәлок-олн ойтнэ тэлат тәра-паттуңкве тув ёхталэгыт. Тувыл ос ань сав хөтпа кол ўнттын мағыс мāl-лөмт винэ урыл китыглахтэгыт.

Ты вәрмалы щирыл ос сав хөтпа ўрхаты. Мәхум юристыт палт нётмил вөвуңкве тув ёхталэгыт,

нёлсәт нупыл акв савсыр тэлат мўсхал щирыл щёпитавёсыт.

Молты тәл сыс Россия мав янытыл, мән округвт олнэ «Защитники Отечества» намба государственной фонд рўпататэ шар ёмасыг лаввес. Ты фонд хосыт хонтлын мәныл юв ёхтум сав хөтпа рўпатал майвёсыт. Хөтпа юв ёх-

Пёс памятникыт ос ялпыңколыт ўргалавет



Тәл օвылтахтам порат округ кўчай
вәҗын нә Елена Майер миркол
нупыл хансым Советыт օлнә мәхум акван-
атыгласанә. Пёс порат ўнттым колыт,
тўшттым памятникыт хумус ўргалым
օнышўңкве эри ос хумус тәнаныл хот-
щёпитаңкве рօви – та урыл тот потыр օлыс.

Ань օлум сапрәнит
тит памятникыг урыл по-
тыртасыт, тән Кондин-
ский районт лүлөг. Ку-
минский пәвылт Победа
хօтал кастыл 1985 тәлт
тўшттувес. Тот сәлтат ху-
ритә вәрим օлы.

Ос Междуреченский
пәвылт яныг хօнтыт
порслым мәхум номнә
мәгсыл 1978 тәлт нама-
ныл хансым әхвтас вәр-
вес. Ты памятникыг сас
налыман тәлыл яныгну-

вег օлэг, сәккон щирыл
тән ўргалаңкве патавөг.

Ань «объект культурно-
го наследия» намыл пёс
колыт ос памятникыт тօнт
ущ хансавет, тән налы-
ман тәлыл яныгнуг вօс
օлэгыт. Тыгыл мощца тәл
те ўнлэгыт, тамле намыл
хансўңкве ат вәрмавет.

Ос хунь тамле намыл
те хансавет, тօнт мօт щир-
ыл пентўңкве манос
мօт щирыл вәруңкве ат
рօви, туп хот-щёпитаңкве

тәртаве. Ты кастыл олн
тәстўңкве нәксылыңыг
ёмты, сака сәв нәпак
атуңкве ос комиссия
суснә юи-пәлт ущ рօви
щёпитаңкве.

Ханты-Мансийский
районт Чембакчина пә-
вылт пёс йис порат ўнт-
тым ялпыңкол օлы. Тав
хуньт норыл ўнттувес.
Ань тօва лօмтанә мәх-
мытын ләкква ты хар-
тыглавет, нәин пәлтавет.
Таимәгсыл кўцаит ты
пёс ялпыңкол Ханты-
Мансийский район Цин-
галы пәвылн тотўңкве
таңхияныл ос тот аквта
щирыл ўнттыяныл. Ты
кастыл комиссия-хօтпат
номтаныл патыс, тән
пуссын ты мәгыс кәтпос
пинсыт.



Куминский пәвылт

Ань пуссын эрнә нәпа-
кыт акван-атавет ос ты
рүпата вәруңкве օвыл-
таве.

Сургут ўст «Дом пио-
неров» кол օс тамле
нәпакн хансўңкве тахвес,
та ўст օлнә яныгпәла
экват ты кол урыл потыр-
тасыт, мансәвит нјврам
тот хаништавес, тувыл тән
намың-суиң хօтпаг ёмт-
сыт, та маныр. Ос Советыт
рүпитан хօтпат номтаныл
ат патыс, ань тав ўргалан
мән ат хасвес. Ты кол
советский тәлыт порат
ўнттувес, таве ань эри
ёмщакв хот-щёпитаңкве
ос ущ хансўңкве. Атиңк
тамле нәпакн хаснә юи-
пәлт таве мўсхалыг хот-
щёпитаңкве тәрвитың
паты.

Елена Майер ты урыл
тох ләвыс, таве хот-щё-
питан мәгыс эрнә нәпа-
кыт вօс атэгыт, олныл вօс
мивет. Та юи-пәлт элаль
ты урыл потыртаңкве
рօви.



Междуреченскийт 1978 тәлт памятник вәрвес



Междуреченскийт вәрим памятник

Галина КОНДИНА

Хальүс район павланэ хумыс олэгыт, тав акваг уральтым оныщиянэ

Округ Дума депутатыг олнэ хум Руслан Михайлович Проводников талэ ёмт тэлы порат Хальүс район хосыт яласы, павлың махмыт ёт потрами, маныр тәрвит оныщёгыт – ёл-хансыянэ. Тыщир яласым, тав макыг вәгтэ, махманэ манарыл онтастанкв эрёгыт.

Тал котиль этпос 21 щислат Руслан Михайлович Проводников Хальүс район Хулюмсүнт павылн ёхталас. Сапрәни вәрнэ магыс павлың махум мирколн атхатыгласыт. Махум ийльпи субсидия-олн минэ урыл потыртасыт, хумыс ты программа рүпиты, манрыг туп олнэ мātēt кол ёвтуңкв рөви? Мән павлувт ийльпи колыт ат үнттавет, таимәгыс кол ёвтнэ пищ атим.

Ань ийльпи постановление щирыл туп наңки олнэ павлынт ман районьнт кол ёвтуңкв рөви, кос кол үнттын олныл ос хоты мән хасхатым олэгыт, туп тот мивен.

Таимәгыс павлың махум пуссын китыглахтэгыт, **Ольга Лагута**, миркол күщай нэ, ләви:

– Мән пуссын акв китыглахтын латың оныщёв, ты вәрмал урыл губернатор ёт потыртаңкв эри. Наң мәнәвн ке нётнувын: ань ийльпи субсидия программа пүсвес, мән пуссын кол ёвтнэ нәпа-канув атуңкв квәлапәс-сүв. Хальүс район мāt артмын щирыл кол ёвтнэ пищ атим. Мән, мән павлың мāt олнэ махум, кол тал хультэв. Мән атвөрмөв ты программа щирыл кол ёвтуңкв. Павлувт колыт ёвтнэ хурипат ати, пуссын пёс колыт. Хальүсыт кол ёвтуңкв ос тот олүңкв мән ат таңхёв. Мән кинәвн кол үнттын щирыл – кол үнттын мāt атим.

Руслан Проводников ләви:

– Ам кәсың ёмт тал котиль этпост Хальүс мām хосыт яласэгум, лов талыг ты ёмтыс тох яласанэм. Ам кәсың павылн хойглэгум, павлың махум ёт хонтхатыглэгум, тән ётаныл потыртэгум, маныр тәрвит оныщёгыт-ёл-хансыянум. Рётың юссуй этпост Думат заседание



Мирколн ёхталам махум

паты, ам тот ты вәрмалит урыл потыртаңкв патэгум, тувыл аквёет номсахтэв, хумыс нётуңкв рөви».

Ос потыр олныс, Хулюмсүнтувт тōва махум коммерческий найм щирыл квартират олэгыт, рүпитанэныл сыс рүпата мән олнэ колыл майлавет, пенсиян ке мины манос рүпат мәныл пōхын ке мины, коланылныл конкётавет. Сосьвинский ЛПУ организацият ку-щаиг олнэ хум **Андрей Бондарь** ос ты сапранит олныс, тав ләви:



Р.Проводников павлың махум ёт

– Ты «Газпром» палыл үнттым колыт рүпитан махмыт магыс. Элумхōлас рүпитанэтэ сыс ко-

туңкв вуйхатуңкв ат таңхёгыт. Тән щиранылтыл, матыр кол үнттын пормас тыг тотуңкв тәрви-тың, тыт талэ-туве яласан лёңх атим. Күщайг олнэ махум ләвёгыт: ийльпи колыт ат үнттавет, кол үнттуңкве сака тының. Хунь матыр порат ань олнэ колыт матур үнт-тыгләлвёсыт, хотмус кол үнттын пормас тыг то-тыгләлсыт, хартыгләлсыт. Тохаңк кол үнттуңкв рөви кос.

Потрум оигпан итыл таххаты ләвуңкв: тармыл олнэ махум тыгыл нэм-хотталы минуңкв ат кос таңхёгыт. Махум тыт кол ёвтуңкв таңхёгыт, ёвтнэ кол атим. Павылт ийльпи үнттым кол шар атим, колыт пуссын пёсыт, 30-40 талыг ёмтсыт. Хунь ты программа хасвес, эрыс ты вәрмалит ёмщакв-нув сунсыглаңкв. Хальүс район махум пуссын акв Хальүсын хунь ләпёгыт.

Руслан Михайловичин пүмашип латың ләвёв, такви махманэ уральтанэ-нэтэ магыс. Ты хансум тәрвит вәрмалынув, номсэв элал вәрмалиг сас-тэгыт.

Анна АЛГАДЬЕВА

Хүл алышлан махум рупатаныл

Александр Михайлович Мотко «Октябрьский рыбзавод» нампa хүл щёпитан колт кұшаиг ґлы. Ты кол Октябрьский район Приобье павылт лов арыгкем тал рупиты. Махум тот сорт, хулюмхүл, сымри, аквсырхүл (лещ) ос мот хүлит пувёгыт, тувыл савсыр тэнутыг щёпитыяныл.

Ты кұшай хум ёт ам Ханты-Мансийск үст «Товары земли Югорской» яныг суссылтап рупитам порат хонтхатыгласум ос рупататэ урыл китыгласлум.

– **Александр Михайлович, хүл щёпитан заводыт ань мансавит хотпа рупитэгыт?**

– Мән касың тал хүл алышлан магсыл савсыр нэпакыт акван-щёпитэв, ос тувыл махум мәнки палтув рупитаңке вёвианүв. Молты тал 55 элумхолас рупитасыт, тән халанылт савыңпалэ сосса хотпат. Тән Шеркалы, Перегребный, Лүй Нярихумит павылт ґлэгыт. Мән разрешение-нэпакыл хансыянүв, тән хүл алышлым яласэгыт. Касың хотпа такви норма ґныщи, мансавит хүл тавен пувуңке эри. Тувыл хүланыл пирмайтыянүв ос тара олныл ойтыянүв.

– **Махум тал сыс хүл алышлэгыт, манос китхурум этпос сыс тох рупитэгыт?**

– Хүл пувуңке тал сыс ат рёви. Тән таквсы порат сүкыр этпос ос мән таквс этпос сыс сав хүл пувуңке вёрмёгыт. Ос тэлы порат яңк ёлы-палт хүлпыл хүл пувёгыт.

– **Манхурип тарвитың вәрмалит ань ґныщегын?**

– Юи-ґвыл талыт акв яныг тарвитың вәрмалё ґлы, Ас ят хүл алышлан мат ат ґныщев. Ты элы-палт мән аренда щирыл Ас я ватат хүл пувуңке вёрмысүв. Нэпакыт щирыл, манавн ат тал сыс хүл алышланке тот рёвыс. Ат тал ювле хулытыс, мот нэпакыл ат майвесүв. Тамле нэпакыт промышленность Департаментыт рупитан хотпат тән щёпитыяныл. Тувыл хүл алышлан мат аукцион щирыл уртавет, тох сав-



А.М. Мотко

нув олн ґщнэ хотпат нөх та патэгыт. Мән сав олн ат ґныщев, вунышалыг та хулытсүв.

Ань мот яныг кұшай рупитаңке ёхтыс, мән тав вәның хотпатн ты вәрмалыанув потыртасүв. Тән нётуңке лавхатасыт ос Минсельхозын ты тэла урыл хассыт, хүл алышлан мат уртуңке хунь патавет, пёс йис пора тэгыт тыт ґлнэ сосса махум ул вос ёрувлавет.

– **Нән хүлыл савсыр тэнут щёпитэгың, ты рупата магсыл ёмас ґбродование ґныщегын?**

– Хүл щёпитан магсыл маныр эри, пуссын ґныщев. Хүлит мән Приобье

павылт тэнутыг вәриянүв. Мән филетировочный машина, хүл тёслын машина, хүл понслын машина, савсыр холодильныкыт пуссын ёвтсүв. Ань тамле эрнэ утыт Россият туп ёвтэв, атиңк саквалэгыт, савсыр эрнэ шаңквыт тыт ёвтуңке вос рёвыс.

Мәнавн тамле тының пормасыт Октябрьский миркол ёвтуңке нёты, савсыр программа щирыл мәнавн олн-нётмил тастыглы, хүл щёпитан колув акваг вос рупиты.

– **Солвалың хүл, посымыл понслым хүланы хоталь тыналэгың?**

– Хүланув мән ляпат ґлнэ ұсытын – Нягань, Югорск, Советскийн тотыанүв ос округув янытыл тыналэв. Павлувт ґлнэ мир хүланув ґс ёмашакв ёвтэгыт. Савсыр ләпкат ёт ґс рупитэв, тән ётаныл договор-нэпакыт хансэв ос ты хосыт хүлыл вәрим тэнутанув тыналэв. Сав пёлям хүланув Тюмень, Екатеринбург ос мот ұсытн кётыянүв. Тал сыс мән хурум арыгкем тонна пёлям хүл элалы тыналэв.



Людмила ТЕТКИНА

Щәнь ләтңыл потрыт хаснэ нэ

Тәл котиль этпос 27 хөталэт Людмила Тихоновна Гурьева намхөталэ блыс. Тав Ханты-Мансийск үст блы, сәв тәл «Ханты ясанг» газетат журналистыг рүпиты, ханты ләтңыл потрыт хансы. Мән Людмила Тихоновна ёт потрамасүв, китыгласлүв, хөт самын патыс, яныгмас. Нэ ләвыс:

– Ямал мāt Азовы намба хүл алышлан пәвыл блы, ам тот тәл котиль этпос 27 хөталэт 1975 тәлт самын патсум. Омагум-әтягум ханты хөтпаг – Тихон Константинович Шульгин ос Зоя Дмитриевна Лонгортова. Колтәглүвт мән ат нйврам яныгмасүв – Альбина, Эльвира, Евгения, ам ос мәнә әпщиюв Артём.

яныгмасүв. Алексей Семёнович бс нййт хөтпа блыс. Элаль ам Маша увшим палт яныгмасум, әтям тав мәнә эще, Сё-Яха пәвылт блсүв. Ты пәвыл Ямал мāt Обская губа намба Карский щәрщ витн лап-амарим вәтат үнлы. Тот ам аквхуйплов класс мус ханищтахтасум. Тувыл Ханты-Мансийск үсн ёхтысум, тыт



«Ёмвош ёх» эргын нэ

Мән Ильягорт пәвылт блсүв, ты әтяв тав яныгмам пәвлэ, Югра ляпат блы, Тэк пәвыл ляпат. Әтяв хүл алышлас, вөраяс.

Мән иң мәниг өлмүв порат, әтяв ос омав әтимыг ёмтсйг. Щащёквав ос бпав палт яныгмасүв. Тән руц ләтың ат вәсйг, мән бс туп ханты ләтңыл потыртасүв. Номилум, 1982 тәлт ам Азовы пәвылн тотвёсум, нулевой классын. Тот тәл сис руц ләтың ханищтасум, интернатыт блсум.

Щащёквам Евдокия Степановна Шульгина, такви бпарищ наме Тарасова, әтятэ нййт хум блыс. Пёс порат ханты мәхум пуссын ёрвә-гыл пёрнапос пинуңкве ләввёсыт, ос тав пәвыл мәхманэ ёт, тох блы, ялпың мән ялантасыт, пүрлахтасыт.

Опам Константин Алексеевич Шульгин 1905 тәлт самын патыс. Тав хөнтлын мән ат вуйлуves, вөр-яктын мāt пуңкотыс. Әтям самын патме тәлт бпав хотталы шалтыс, иң мәньлат блыс кос. Щащёквам нйвраманэ ёт тактёт хультыс, тувыл Алексей Семёнович Шульгин ёт акван-минасыг. Мән тав палтэ

педколледжит Нижневартовский пединститут филиалэ блыс, тот ханищтахтасум.

Людмила Тихоновна 1999 тәлт институт әстламе юи-пәлт «Ханты ясанг» ос «Лүймә сәрипос» газетаг вәрнэ колн патхатас. Ты урыл тав тох потыртас:

– Төнткүцаиг Мария Кузьминична Волдина рүпитас. Ам тав кол-накөн шалтсум, рүпата урыл китыглахтасум. Мария Кузьминична ам ётум ханты ләтңыл потыртас, щәг-тым ләвыс, тән щәнь ләтың вәнэ мәньлат хөтпат рүпитаңкве үрёгыт, матьёмас ёхтысум. Ләвыс, холытан рүпитаңкве вос бвылтахтәгум. Ам кон квәлсум, амтиротномсёгум, тав шар щащёквам хурипа, бс тамле сымың хөтпа, щәнь ләтңыл потырты.

Газетат сәв тәл Таисья Степановна Себунова рүпитас, тав мәнавн акваг нётыс, матырати хультыглас. Тувыл Реональда Степановна Ользина рүпитас, бс акваг нётыс. Газетат рүпитанэм сис округ янытыл сәв мāt блсум. Овыл командировкамн мәньщи мәхум блнэ мән ялсум, Хәльүс



Л. Гурьева

район Лөпмус пәвылн, 2000 тәл порат мәньполь этпост. Тот Уй ййквнэ вәрмалы блыс. Яныгмам мәмт ам Уй ййквнэ вәрмалы вәшинтасум, суссум, хумус бпам ос пәвыл мәхманув тўлыглахтасыт. Лөпмуст суссум, хумус мәньшит Уй ййквёгыт, тўлыглахтәгыт. Яныг-хөтпа мощца блыс, янгыш мәньлат мәхум. Ётыл Белоярский, Сургутский, Нижневартовский районьтн ялантаңкве патсум, Ямал мāt блсум. Сәв мәхум ёт хөнтхатыгласум, потраныл ёл-хансыгласанум.

Людмила Тихоновна аспирантурат ханищтахтас, 2009 тәлт диссертация нэпаке вуянтастэ. Тувыл тав кандидат филологических наук учёный намыл майвес. 2018 тәлт таквсы порат тав ханты нэт ёт «Ёмвош ёх» («Ханты-Мансийск үс мәхум») эргын ансамбль вәрыс, ханты эргыт эргёгыт. Эргим тән Россия янытыл сәв мāt блыс – Тюмень, Выборг, Нижний Новгород, Мегион, Сургут ұсытыт ос мөт мāt.

Людмила Тихоновна хөтпа нупыл сымың элумхөлас, мўтраң нэ. Тав әги ос пыг янмалтас, Анна ос Алексей. Нйврамаге округ соссa мир блупса вәгтән, ханты ләтың ос пёс йис накыт янытлыанн. Ойкатэ наме Юрий Александрович Гурьев, тав бс хөтпа нупыл сымың элумхөлас.

Мән, «Ханты ясанг» ос «Лүймә сәрипос» газетаг вәрнэ мәхум, Людмила Тихоновна намхөталэт янытлылүв! Сәв тәл пус кәт, пус ләгыл вос блы, Нәй-Отыранән вос ўргалаве!

Светлана РОМБАНДЕЕВА

Мāньлат порат ханищтахтам тāланув акваг номиянүв

Ты сāтыт
ўщлахтын
хōталēt Россия янытыл
Татья нам бōннэ хōтпат
тāн ялпың хōталаныл
ос студентыт бō
янытлавет. Кāсың
элумхōлас манах тāl
кос вос бōлы, тав хōт-
āти ханищтахтам
тāланэ акваг
номылматыглāлыянэ.
Лүимāt бōлнэ тōва
āгит-пыгыт Ленинград
(1991 тāl мус), ётыл
Санкт-Петербург
ўст, А.И. Герцен
нампa институтыт
ханищтахтаманыл
порат сāvсыр тēланыл
урыл бō потыртēгыт.

Мōлты тālт ты Лүимā
институтт 95 тālэ тōвлуме
порат Салехард ўсныл
ēхталам нэ Светлана
Вальгамова ēт акван-
хōнтхатыгласүв. Тав ханты
лāтың урыл диссертация
хансыс ос 2003 тālт
филология наукаг канди-
дат нам вуянтас. Ань мā-
навн тав таи номылма-
тыглым лāвыс:

– Мāн Лүимā институ-
тув такем такви щирыг
бōлы, тот мāн сака номтың
сāvсыр хōтпатн ханищ-
тавесүв. Ам «рущ, ханты
лātңыг ос литература
ханищтан нэг» диплом
бōнщēгум. Тōванакт, вāим,
ты кос мāнавн сав бōлыс
ос савлуңкве нēmхотъ-
ютын ат тāртвесүв. Рущ
ос старославянский лāt-
ңыгн сака ēмщакв хани-
щтавесүв. Физкультура
уроки минēгын – тот
аквтупмат яныг спорт-
смен хōтпаг вāруңкве
таңхавен. Изобразитель-
ный искусство ханищтан



А. Лещук пыг ēт ēнги

мāгыс мāн «Русский
музейн» ос «Эрмитажн»
ялантасүв. Музыкaт сāv-
сыр тēланэ вāнэ мāгыс
филармониян, театрын
кēтыглавесүв.

Математика урокин
ēхтēгын, таи аквтупмат
ты предмет вāнэ хōтпаг
щēпитавен. Биология ос
физиология тēлат ха-
нищтамув порат матум
профессор-бōйка мāнавн
лāви: «Мощēртын тēңкве
минēгын, тот тōвтлахты-
нэн сыс кāсың рефлекс
урыл номылматэн тах».

Ам тōнт ўщлахтын мā-
гыс «Северное Сияние»
нампa ййквнэ колн хас-
хатасум, номсēгум тот тах
кўпнит, эрыгсовыт хўнт-
лын сыс ййквуңкве патē-
гум. Ййквнэ вāрмалитн
Татьяна Фēдоровна Пет-
рова-Бытован ханищта-
весүв. Тав матум ēква
бōлыс ос мāн тот рēгтыг-
лан мус поргысүв, лүимā
мāхум ййкваныл ханищ-
тасанүв. Татьяна Фēдо-
ровна тōванакт ты кос
āгманэн илямтālвес ос
тав бōста мāн палтув ēх-
талас. Ам диссертация
хасмум порат акваг таве



Е. Наков, Р. Потпот, С. Вальгамова, Н. Ребась

номылматыглāлыслум,
тавēн бōс тāрвит бōлыс кос
ос тав таквинātэ нōңхаль
паттым рўпитас. Тох та
мāн тōнт иң Ленинградыг
намаим ўст бōлсүв.

Ты порат бōлнэв сыс,
мāнавн ань таи ēмас, ты
Лүимā мырыт ханищтан
институт ань тыг мус
элалъ рўпиты, мāньлат
āгит-пыгыт тот сэрēрыг
ханищтахтēгыт. Олупса-
ныл пўмщиг бōлнэ мāгыс
ос пēs накыт мōт мāхумн
вос вāвет, тāн кāсың тāl
оигпан элы-пāлт «Лучшая
хозяйка очага» касыл
вāрыглēгыт. Ты касыл
мощаг хультум мырыт
щāнь лātңаныл ос пēs
наканыл элалъ тотнэ мā-
гыс лов тāлытн хўлтыг-
лым бōлы.

Ювле хультум 2025
тāl мāv вуянтам хōтпат
тāлыг лāvвес, ань таимā-
гыс ты пора касыл «Муж-
чины моего рода» намт-
вес ос тот ат студенткат
сāvсыр номинацияг
тāнки халанылт кассыт.
Тот ēрн, мāньщи, коряк,
долган ос рущ āгит тāнки
мираныл ос хум хōтпат
рўтаныл бōвылтыт матыр

суссылтым потыртасыт,
мōт касылыт эргысыт ос
ййквсыт, пāйтым тēнутыл
мāхум тыттысаныл. āгит
аквēт ханищтахтын ма-
нос ты институтт рўпитан
хōтпатн нēтвēsыт.

Мāньщитныл каснэ
āгийг Анастасия Лещук
бōлыс, тав Зоя Степановна
Рябчикован нēтвес. Акв
касылыт āгитн «Отыраныл
мōйт» матыр пēs потыр
хольт суссылтаңкве эрыс.
Тāн кит мāхум халмал-
тахтам бōвылтыт мōйт
вāрсыт. Ты мāхмыг палт
āги ос пыг эруптахтасыг
ос тувыл акван-бōлуңкве
ат тāртвесыг. Таимāгыс
мāхум āла ты хōнтлуңкве
патсыт, тōнт āгийг-пыгыг
Сўкырья ос Сакв кит яг
ēмтсыг ос ань тыг мус
акван та овēг.

Ань сāvсыр щирыл кас-
маныл юи-пāлт Анаста-
сия Лещук нōх-патыс, мōт
āгит наманыл акв хотты
номинацияг янытлаве-
сыт, мўйлупсатыл мўй-
луптавēsыт. Тох та лүимā
студентанув ань Санкт-
Петербург ўст бōлēгыт ос
ханищтахтēгыт.

Тамара МЕРОВА

Тав сәтапыл хорамың төрыт юнты



Г.С. Вакуева ёмаспал нупыл ўнлы, апыгрищанэ эргёгыт



Катыл вәрум пормасанэ

Мөлтү тәлт округув намхөталэ кастыл акван-атхатыглам накыт ос сәвсыр касылыт вәрыглавёсыт. Тох округ творчество колт «Судьбы моей простое полотно» руш щырыл намтым суссылтап вәрыглавес. Тән «Хурит пөслын элумхөлас» акв проектаныл хосытыл тәнки палтаныл Галина Семёновна Вакуева вөвиньтәлсаныл ос тав такви пөслум хуриянэ ос сәтапыл хорамыл юнтум төранэ суссылтавёсыт.

Таве янытлан мәгыс агитэ ос апганэ эргысыт-ййквсыт, нётнэ турсуил Надежда Рокина ос Марина Неттина, «Ёмвош ёх» намба ханты эргыт эргын нэт эргысыт. Төнт сака ёмас акван-хөнт-хатнэ этипәла ылыс.

Галина Семёновна, такви өпарищ наме Рудакова, Хәйүс райме Саранпәвылт самын патыс. Тот пенсиян мин-нэтэ мус нәврам ўрнэ колт кўщай нэг рўпитас. 2021 тәлт тав Ханты-Мансийск ўсн агитэ ос апганэ палт вәнтлыс. Ань творчество колт рўпитан нэг Фаина Павловна Иштимирова ос Марина Анатольевна Проняева Галина Семёновна вәрум пормасанэныл пўмыщ суссылтап щёпитасыг ос нэ урыл потыртасыг. Галина Вакуева такви

урет таи ләвыс:

– Ам Саранпәвыл школа әстламум юи-пәлт Ханты-Мансийск ўст педучилищат ханищтахтасум. Школат кәркамьг өлсум, алпим тәксарыг өлнэ мәгыс гимнастика вәрсум, мөчикыл ёнгуңкве ос «брусьяг» намаим утыл упражняният вәруңкве хәссум. Школат мәнав советский спорт палт мирн вәнэ хөтпа Андрей Яковлевич Хатанев ханищтастэ. Тэлы порат агиришит-пыгришит ёт акваг ёсал хайтыгтасүв. Ос педучилищан ёхтумум порат тот физкультура ханищтан хум хот-өщатхтас, аман хотыл ам такем кәркамьг пуссын упражняният вәриянум остувыл «волейбол» ёныг командан вистэ.

Тувыл тот ййквнэ колн ялантаңкве патсум ос

та ййквнэ мәхманум ёт округ янытыл тотыглавёсүв. 1974 тәлт училище әстламум юи-пәлт ам ювле Саранпәвылн ёхтысум ос тот өвлэт лов тәл нәврам ўрнэ хөтпаг рўпитасум ос ётыл нёлолов тәл «Сәлыкве» нәврам ўрнэ колт кўщай нэг өлсум.

Ты коньпал Тобольск ўст юил яласым ханищтахтасум, тот 1980 тәлт Д.И. Менделеев намба педагогический институт әстласлум. Ос та юи-пәлт 18 тәл Саранпәвыл школат математика урокыт нәврамытн ханищтасум. Анумен нәврамыт ёт рўпитаңкве акваг мўстыс, таимәгыс клуб колт тән мәгсыланыл ам ййквнэ кружок вәрыгласум. Ту-выл «ионика» музыкальный инструментыл ёнгысум ос клубт рўпитан хөтпат ёт концертыт вәрыглым сәлың мәхум колн ялантасүв. Төнт совхозувт сәв сәлың пиркатат өлсыт.

Галина Семёновна хум вәрме порат щёмьятэ мәгыс сәвнүв пора хультуптаңкве патыс. Тав щёмьян ансамбль вәрыс, щёме гармошкал ёнгыс, агитэ ййквыс, тән хөт-әти

касыгласыт ос матахмат щёс нөх-патыгласыт.

2005-2008 тәлытыт Галина Вакуева Саранпәвылт миркол пәлыл депутатыг пөриялвес. Төнт пәвылт өлнэ сәвсыр тәлат ёмшакв щёпитаңкве нётыс. 2012 тәлт «Российский академия народный хозяйства ос государственный служба» намаим программа щырыл «Менеджмент организация» хөтпаг элалы ханищтахтас.

Галина Семёновна акв мәт ат ўнлантас, акваг матыр-әти тәлат вәрыс. Юн тав оматэ Александра Ивановна Рудакова такви пўтыска төрыт, вильт сэгнэ төрыт хорамың сәтапыл юнтыгласанэ. Төнт тав нуплэ сунсын ань тав пормасыт өс хорамтаңкве патсанэ. Тыт ань төва пормасыт суссылтавёсыт. Галина Семёновна пуссын ўйхулыт халт матрыг лувыт сака эруптас. Ань ты пормасыт палт лув хурит нас пөслым манос сәтапыл хорамтым өлсыт. 2026 тәл ань лув тәлыг ловиньтаве. Нэ ань пус-тәгыл, сөтыңыг ос щуниңыг вос ылы!

Тамара МЕРОВА

Элын үнлын павлыт тэланыл

Елена Валерьевна Савчук Хальүс район Кульпас павылт «Рахтынья» намба хул алышлан общинат эрнэ нэпакыт мұсхалыг щёпитым рүпиты. Мөлты тал Когалым үст округувт өлнэ сасса махум яныг конференциян акван-атхатыглам порат, нэ өс тув ёхталас. Тонт округ күщаитн ос сасса махумн ты община рүпататэ ос Хальүс район павлытт вәрмаяныл урыл нэ тох потыртас:

– Хальүс районт сав мань павыл олы. Тан сака элын үнлэгыт, тув ялнэ ёмас лёңх атим. Савыңпалэ тот маньщит, хантыт, ёрныт ос саран махум өлэгыт. Туи порат махум хотты яныг үс мус вертолётыл Приобье павыл манос Хальүс ұлтта тыламлэгыт. Тэлы порат ос Ягрим тара тэлы лёңх хосыт яласэгыт. Воссыг мот ялнэ-миннэ лёңх атим. Савнув махум Хальүст ос Ягримт өлэгыт. Ты павлыгныл яныг үсн ёхтуңкве кұстырнуве.

Кульпас павылт «Рахтынья» намба хул алыш-

лан община 2001 тал пасныл рүпиты. Ань хус арыгтем талыг ты ёмтыс, тот күщаиг акваг Александр Игоревич Голошубин олы. Хальүс район Лопмус, Сортыңья, Рактя мањ павлытт, ань ос Няхщамволь, Хулюмсұнт павлыгт рүпата торың атим.

Яныгпала хотпат пенсия-олн выгыт. Хотты хотпат ос пособие-олнныл ойтает. Товат рүпата оньщегыт кос, ос савыңпалэ павлың махум туп хул алышлан ёрыл өлэгыт. Ты пувум хуланыл ос воруи сованыл ты общинан олн магыс майлыяныл.

Ман мавт ма-вөй ос газ маныл нөх ат виве. Ты хосыт тот өлнэ мир нэматыр яныг нётмил ат оньщегыт. Савыңпалэ «Рахтынья» община тот өлнэ мирн нётмил вәри.

Елена Валерьевна лавме щирыл, ты общинат рүпитан хотпат туи порат Тагт я ос Сакв я хосыт махум тотыглыяныл. Туяг ос таквсы порат яласан лёңх шар атим. Тэнут-пормас тотнэ магыс тэлы лёңх ват сәграпнал этпост ушта вәраве. Мот щирыл павлытн ёхтуңкве нэмхотмус.

Ты вәрмалы мұсхалыг щёпитан магыс, мөлал общинат рүпитан хотпат ма-вит үргалан департамент хосыт грант-олн висыт ос лёңх тал порат яласан хәпыт ёвтсыт. Руш щирыл ты хәп «Аэро-лодка» лававе. Ань мань вит порат ос яңк ёмшакв ат пөльнэ порат, павлытн тэнут-пормас, тэрпит ос махум ты хәпыл тотыглавет. Төва порат тәрвтыңыш өлнэ нэт пүльницан ты хәпыл тотавет. Тувыл ювле павыл мус өс тамле хәпыл минэгыт.

Елена Савчук такви Кульпас павылт самын патыс, тот яныгмас. Тав лавме щирыл, хотыюты щёмьяң тагыл хотталы




Е. Савчук

яныг үсн минуңкве кәсәщегыт ке, тан пуссын аквёт вертолётын ат ликмөгыт. Я хосыт махум тотыглан хотпат ос сака сав олн миннэ лёңх магыс выгыт. Щёмьяң хотпат тысавит олн ат оньщегыт.

«Рахтынья» общинат рүпитан хотпат ты хәпыт 2024 талт ёвтсаныл. Хүрмит тал рүпитанэныл сис сав сасса хотпатн нётсыт. Ты хосыт махум сака щәгтым өлэгыт. Ты коньпал тамле хәпыт өңнэ хосыт тан ань савнув хул алышланкве ос пирмайтанкве патсыт. Хул пувнэ коньпал, ты община танки савсыр тэнутыт хулныл вәрөгыт ос танки ләпканыл тыналэгыт.

Николай МЕРОВ



Ханищтахтан мәньлат хөтпәт ялпың хөтәл

Тәл котиль этпос 25 хөтәлэт Россия янытыл ханищтахтан мәньлат мәхумыт ос Татьяна нам янытлан хөталыг олы. Кәсың тәл колледжит ос институтта ханищтахтан мәньлат хөтпәт янытлавет. Та кастыл музейт ос культура колыт сәвсыр вәрмалит вәрыглавет.



Агит хорам вәрәгыт



С. Дядюн потырты

Ханты-Мансийск үст Технолог-педагогический колледжит ханищтахтан мәньлат агит «Төрүм Маа» музейн ялсыт. Тән воспитателиг ос нйврамыт ханищтан нэг ханищтахтәгыт. Ханты-Мансийск үсн сәвсыр павлытныл ёхтасыт. Тыт специальность ос диплом нэпак выгыт тах. Тувыл элалы рүпитаңкве патәгыт. Сосса мир музейт рушләтңыл намтымтамле вәрмалы «Мечтай ярко, живи смело: карта желаний студента Югры» олыс.

Ханищтахтан мәхумыт мәгыс Светлана Дядюн Юван Шесталов олупсатә урыл потыртас. Тав ләвыс, хумус мәньщи хум олыс, тувыл стихыт хансас. Потыртас, манрыг «Төрүм Маа» музей тамле нам оныщи. Тав ләвыс, ты нам ос хоты мәт үнлуңкве паты, Юван Шесталов такви пёрьяс, та пәсныл ташир та ләваве. Ханищтахтан хөтпәт та кабинет-

на шалтасыт, Юван Шесталов нэпаканэ сунсасыт.

Елена Федотова, «Төрүм Маа» музейт кұщай нэ, мәньлат хөтпәт мәгыс ханищтап вәрыглас. Та тәла «Карта желаний студента Югры» нам оныщас. Тот мәньлат мәхумыт нэпакыл хорамаң лөмтыт яктасыт, тувыл яныг нэпак-лөпсын ханласаныл. Тув хансасыт, маныр ты 2026 тәлыт таңхёгыт. Нэ-

пак котильт тәнки хурияныл ханласыт. Тувыл нэпак янытәт тәнки номтанылт пустәгыл олнэ урыл, яласан вәрмалы урыл, ханищтахтан вәрмалы, щёлың урыл хансасыт. Ханищтап палыт мәньлат мәхумыт халанылт потыртасыт ос щай айсыт.

Елена Федотова ханищтахтан поратә номылматәластә. Тав ләвыс,

хөт ос хумус ханищтахтас. Ханищтап юи-пәлт мәньлат мәхумыт нэпак-лөмт висыт, тот кәсащан ләтңыт хансасыт.

Тувыл ам ищхйпың ут тәра мәньщи пыг ёт хасхатсым. Тав наме **Денис Филатов**, Югорск үсныл олы. Тав ЮГУ колт нилыт курсыт мә-вит үргалан хөтпаг ханищтахты. Пыг тох ләвыс:

– Ам ты специальность пұмащиг кәсаласлум. Номсәгум, ты эрнэ рұпата, тәймагыс мә-вит үргалан хөтпаг ханищтахтәгум. Тувыл ЮГУ колт военный ханищтан центр олы, ос таимәгыс тыг ёхтасум.

Тыт сәвсыр вәрмалит ёмталәгыт, тув акваг ялантәгум. Ам ЮГУ колт Лүймә центрыт рүпитәгум. Мән мәньлат хөтпәт лүймә янытыл олнэ сосса мирыт культураныл урыл ханищтыянүв. Тувыл лүймә мирыт ләтңыт үргалан ос элалы тотнэ мәгыс сәвсыр тәлат мәньлат мәхумыт мәгыс вәрөв.

Анумн сака ёмас «Студенческая весна», ты тәла ханищтахтан агитпыгыт мәгыс олы. Хунь нэматыр ат вәрөгум, ам юртанум ёт ёмыгтәгум. Овыл курсыт ханищтахтан мәньлат мәхумытна ләвөгум, нэматырыл ат эри пилуңкве.

Мәньлат мәхумыт ялпың хөталыл янытлыянүв! Элалы ёмашакве вос ханищтахтәгыт, халанылт вос нётхатәгыт. Номтың вәрмалит вос ёмтәгыт. Тувыл кәсың хөтал щәгтым вос олы. Пус кәт, пус ләгыл вос оләгыт!

Галина ДУНАЕВА



Музейн ёхталам хөтпәт

Ишколат ос газетат рүпиты



Татьяна «Вано» клубн яланты



Ёрнкол пөхат пөслувес



Санкт-Петербург үст

Мән савсыр мирыт халт өлэв. Россия янытыл 190-кем мирыт, тувыл 47 мән лүимә мирыт өлэгыт. Мәхумыт щән-ащ ләтңыл потыртэгыт. Тувыл тащир лүимә ләтңыт иң лылыңыг өлэгыт. Тыхотал нән Ямал мāt өлнэ аги урыл потыр ловиньтаңкве патэгыт.

– Ам намум Татьяна Андреевна Сэротэтто. Ам ёрн аги, Яр-Сале павлы-ныл өлэгум. Тот самын патсум. Павлум Ямалский районты Ямало-Ненецкий автономный округт ылы. Ёрн ләтңыл «Яр» - сэй, «Сале»-я нёл. Руш ләтңыл «песчаный мыс» ләваве. Павылт хөт сөтыркем мәхум ылы. Савнум тай ёрн хөтпат өлэгыт.

Ямал – ам сосса мām. Тыт самын патсум, ишколат аквхуйпов тәл ханищтахтасым. Пёс ёрн рүтанум өлсыт, тувыл иң өлэгыт. Ам щәннум ос ашум Ямал тунра мāt вәнталәлым өлэг. Тән сәлы яммалтан хөтпаг. Ань государственный ос частный сәлыт ыныщэг.

– **Татьяна, ләвен, хумус ишколат нъяврамыт ханищтаңкве патсын?**

– Россия мāt шар яныг ишкола-интернатта ханищтахтасым. Тот шар сака

сәв нъяврам өлсыт, ань өс өлэгыт. Интернатта тунра мāt өлнэ ёрн нъяврамыт яммалтавет. Ам өлупсам сәв тәл тот хулытыс.

Ишколат 11 класс холтсум, тувыл Санкт-Петербург яныг үст А.И. Герцен наппа лүимә институтна ханищтахтәкве миначум. Тот нила тәл ханищтахтасым. Специальностью этнофилология ләваве. Ань амки ишколат рүпитэгум. Нъяврамытна лильпи номт виңкве нётэгум. Ишколат руш ләтың ос литературал ханищтыяну. Ётылнум нъяврамыт ёрн ләтңыл ханищтаңкве патэгум. Ам шар яныг классумт 26 хөтпат үнлэгыт. Мөтыт классыт 11-12 нъяврам ылы. Ханищтан вәрмалюмт вәт нупыл нила щёс кәсың сәт ыныщэгум.

Тувыл ищхыпың мāt лөпс ыныщэгум. Тув ёрн ләтңыл матыр-әти пинэ-



Таня мән порат ёрнколт

гум. Ам ос газета редакцият тамле наппа «Нярьяна Нгэрм» рүпитэгум. Тот мән потрыт ёрн ләтңыл хансэв.

Ань элалы институтта магистратурат ханищтахтэгум. Санкт-Петербург үст ханищтахтым порат, мән ёрн ләтңыл потырым клуб вәрсув. Тав «Вано» нам ыныщи. Ты вәрмалы иң лылыңыг ылы. Яныг үст ханищтахтым ёрн хөтпат вөрмэгыт тув ёхтүңкв, тувыл щән-ащ ләтңыл потыртаңкве. «Вано» клуб пөсув – ёрн мәнлат мәхумыт акван-атыглаңкве. Вустән халанылт вәйхатуңкве

патэгыт. Тащир мәнлат хөтпат мәнки ләтңув элалы тотыяныл.

Ты проект ищхыпың мāt намың-суиңыг ёмтыс. Тувыл ёрн газетан хөтвёсум, тув рүпитаңкве вөвүңкве патвёсум. Ань китыт тәл тот рүпитэгум. Ляххалыт хансэгум, кроссвордыт вәрэгум ос сәвсыр вәрмалы, хоты газетат атом өлсыт.

Татьяна Андреевна, сәв ёмас, сымың ләтңыл кётылум. Пус кәт, пус ләгыл! Тав элалы тотнэ вәрмале лылыңыг вус ылы!

Галина ДУНАЕВА

Варьёган павыл Өлүпса

Нижневартовский районт Аган я ватат акв сака нётнэ павылкве Өлү – Варьёган павыл. Ханты Өс ёрн махум тув пёс порат Өлмүгтасыт. Ты урыл Сибирь лүй ма ханищтам исследователь хөтпа, краевед А.А. Дунин-Горкавич (1854-1927) «Тобольский Север» нэпакёт хансыглам. Павыл ань таимагыс тох намаявес, тот лятат Варын-Ягун я Өвты, ханты латыңныл маньщи латңыг толмашлаңкве те – Өрпил төварттан я.

Ты талытыт Варьёган павыл Новоаганск павыл палт тұлвес, мирколаныл ань тот Өлү. Матыр Өрнэ нэпакыт катын-паттын магыс, павыл махум тув ялантэгыт. Перепись населения щирыл, Варьёган павылт 695 хөтпа Өлү, яңгыщ ханты Өс ёрн махум, рушит Өс мөт мирыт Өс Өлэгыт.

Павылт школа, интернат, няврам садик, пүльница Өс ләпка Өлү. Кит напка физкультурно-спортивный кол ўнттаве, кўщаит лавманыл щирыл, ты тал Өстлаве.

Этнографический парк-музей Өньщёгыт, 1987 тал пәсныл рүпиты. Ман ты музей урыл хансыгласүв, ань Өс школа урыл ловиньтән.

Варьёган павыл школан щалтсамум порат, тот рүпитан хөтпат ёт потрамасум.

Тамара Гордеевна Казамкина няврамыт ханищтым хус арыгтем тал рүпиты. Нэ лавыс:

– Ман школавт Өнтырсәт нупыл хөт няврам ханищтахты. Элнаң сәв хөтпа ханищтахтас, интернатыт китсәт арыгтем мань махум Өлсыт. Ань тот китхуйплов няврам туп Өлү. Ам Өс ты интернатыт Өлсум.

Школа Өстламум юипәлт Ханты-Мансийск ўс педучилащат ханищтахтасум, тувыл амти мам йисум. Тыт ань няврамыт щаквщүңкве ханищтыя-нум.

Кит кружок Өньщёв – «Бисеринка» Өс «Кәркам эви». Ам уроканумн ват арыгтем хөтпа ёхталэгыт, катыл матыр мащтырлэв. Ты коньпал агиришит Өс пыгришит ханты латңыл потыртаңкве ханищтыя-нум. Школавт яңгыщ



Т.Г. Казамкина Өс 2 классыт ханищтахтын пыгрищ Артём Контеров

ханты Өс ёрн няврамыт ханищтахтэгыт, рущ Өс мөт мирыт нявраманыл Өс Өлэгыт.

– **Тамара Гордеевна, наң интернатыт яныгмасын, Өс колтагыл махманын хотыл Өлэгыт?**

– Ам ханты колтагыл самын патсум, махманум вөрт сәлы ўрим яласасыт. Каникулыт порат юв сәлың суныл тотавёв. Өйкам Өс ханты хум, мән хұрум пыг янмалтасмән. Яныг пыгмән рүпиты, колтагылыңыг ёмтыс. Кит пыгагмән ань Ханты-Мансийск ўст Өлэг, котиль пыгмән ЮГУ колт, мань пыгмән колледжит ханищтахтэг. Тән пуссын щәнь латңыл потыртэгыт,

пёс махманыл Өлүпса вәганыл. Атяныл ёт маньтагыл вөраёгыт, хұл алыщлэгыт.

Школат музей Өлү, тув сәв пёс йис пормасыт акван-атвёсыт. Музей колнак тармыл Любовь Владимировна Филатова тав пуңкоты. Ты нэ ёт Өс потрамасум, музей урыл китыглахтасум. Хумус рүпитэгыт, маныр тот акван-атым Өлү, ты урыл тах акв хотты газетат Өлалъ хансёв. Варьёган школат рүпитан хөтпатын сәв ёмас латың лавёв, пуштагыл вос Өлэгыт.

**Светлана
РОМБАНДЕЕВА**



Няврамыт катыл вәрум пормасын



Варьёган павыл школа

Самарово ишкола намхоталэт янытлылүв!

Ты тәл Ханти-Мансийск үст өлнэ № 2 ишкола 85 тәлэ төвлыс. Пёс порат Самарово павыл блыс, ань тыщир Ханти-Мансийск үс акв өвлэ ләваве.

1941 тәл порат тәл котиль этпост ишкола №2 үнттүвес. Тувыл та пәсныл нйврамыт ханищтахтан кол рүпитаңкве өвылтахтас. Тав нётнэ Иртыш я вәтат үнлы. Арефьева Ольга Владимировна, яныг нйврамыт ханищтан нэ, хуньт ләвыс, хоты мәт ишкола үнттүңкве эри.

Лүпта этпос порат 1941 тәлыт лүль хонтлан вәрмалъ ёмтыс. Ишкола әстлан өвыл нйврамыт хонтлан мән минасыт. Төваныл аквювле ат ёхтасыт... Иван Герасимович Шаркевич ты ишколат ханищтахтам хөтпа 1960 тәл порат эрыг хансас «Ребята из школы второй». Тот хонтлан мәхумыт урыл хансым блы.

85 тәлыт сыс 15 күщай ишколат рүпитасыт. Тамле мәхумыт: Хомялев Николай, Коренькова Надежда, Филипович Александр, Чевжик Нина, Болотова Альбина, Лобанов Алексей, Пашин Андрей Филиппович ос мөт элүмхөласыт.

Андрей Филиппович Пашин пёс йис тәлат ханищтан хумыг блыс. Самаровский ишколат 1959 – 1979 тәлыт порат рүпитас. Хөнтлум хум, сәв награда бөныщи: Орден Отечественной войны өвыл степень, мөталит



№ 2 школа, Ханти-Мансийск үс

«За отвагу», «За взятие Будапешта», «За взятие Вены». Ишколат рүпита-ме порат мәхумыт акван-атыглас, тән ёмәщакве халанылт өлсыт.

2010 тәлыт яныгпөль этпос порат ишколат әхвтасың пәрт тагатавес, тот Андрей Филиппович наме хансым блы. Тувыл 2022 тәл порат акв хаснэ пасан вәтат ёмәщакве ханищтахтан нйврамыт ос спортсменит вөрмасыт үнлүңкве.

1997 тәл порат №2 ос №4 ишколагакван-түлвөс-сйг. Нйврамытлильпи мән вәнтласыт. Күщаиг Болотова Альбина Михайловна паттүвес. Тав нйврамыт аквёет румалахтым өлуңкве ханищтаңкве патыс. 2004 тәлыт №2 ишколатпамятник вәрвес.



№ 2 пёс школа, 1950-1960 тәлыт порат пөслүес



А.Ф. Пашин

мүйлүпсал 22 ханищтан хөтпат янытлавөсыт. Ыс мир эсгын пәртитат хөтпа наманыл хансым өлэгыт.

№2 ишкола тамле мөталь «За заслуги в педагогической и общественной деятельности» Н.И. Пирогова бөныщи. Россия янытыл конкурсыт «Лига лидеров – 2021» нөх-патыс. Тувыл «За вклад в развитие города Ханти-Мансийска» пөс бөныщи. Ты ишкола әстлан нйврамыт сәвсыр мәт рүпитэгыт. Тамле хөтпат: хаснэ мәхумыт, лөккарыт, нйврам ханищтан хөтпат, армият лусытан хөтпат ос мөт мәт рүпитэгыт.

Нйврамыт ханищтан мәхумн сәвсыр ёмас ләтың ләвөв. Элалъ кәркамыг вус рүпитэгыт, вус кәсың тәл нйврамыт ханищтахтэгыт, ос ишкола әстлэгыт. Самарово павыл ишкола яныг намхоталыл янытылүв!

Ты потыр ищхйпың мәт вислүв. КУ «Государственный архив Югры». Фонд 669. Опись 1. Дело 8. Книга «Летопись средней общеобразовательной школы № 2 г. Ханти-Мансийска (1941-2023)». Пуртова Людмила Геннадьевна хансым потыр.

Потыр мәнөныщи ләтың
Галина ДУНАЕВА
толмашластэ

Хөнтүт порсум пыгыт номнэ мәгсыл касыл блыс

Ты этпос хөтхуйпов хөталт Ханты-Мансийск үст мәньлат агит-пыгыт халт товтыл хайтнэ касыл блыс. Ты касыл «Стерх» намба полицият лусытам пыг Виктор Николаев кастын мәгыс касын тал вәрыглаве. Ты пыг хөнтлын мāt порславес. Тав Россия биатлонт мәштыр нам бнышис. Ты касылын тав нйврамыт ханищтасанэ.

Товтыл хайтнэ касыл пүснэ хөталт Югра мāt Росгвардия кұшай хум **Евгений Симаков** лавыс:

– Ты касыл «Кавалер Ордена Мужества» намба мәгыл пōс бнышум мән хөнтлум юрт хөтпав номнэкастыл щёпитәлылүв. Виктор Николаев полицият сержантыг лусытас. Округүвт блнэ агит-пыгыт ань тыт нилыт щёс касуңкве акванатыгылянүв. Ты каснэ тәла хосыт Росгвардият лусытан хөтпанув пилтәлыг блэгыт. Мәньлат мэхум тамле тәксар хөтпатныл вос янытлахтасыт, мәнки мāv эруптым вос үргалыяныл. Ты касылыт мән хөнтүт порсум мэхум пуссын номылматянылүв.

Росгвардият рүпитан хум Евгений Симаков потре щирыл, округ бвыл кұшай хум А.В. Филипенко намыл маим товтыл каснэ мāt суссылтап



В.Н. Николаева

вәрыглавес. Тот хөнтлын мāt яласам машина үнлыс, пыг хуритэ тув вәрим блыс. Виктор Николаев 2022 тәлт мәньполь этпос сатыт хөталт та машина ляпат порславес.

Оматэ Вера Николаевна Николаева бс тув ёхталас. Нэ пыге урыл мощ потыртас. Тав лавыс, Виктор щёмят мән пыгыг блыс. Тавён туп вāt нупыл хөт тал төвлыс. Мән порат тав өвлэт өпатэ хольт, тувыл атятэ хольт, ётыл ос ОМОН мāt лусытан акитэ хольт мāv үргалым лусытанкве кәсашас.

Виктор школат ханищтахтаме порат акваг товтыл касыс. Хунь китхуйпов тәлэ төвлыс, Победа хөтал кастыл школат «Пүмашипа наңын, сәлтат!» намба потыр хансыс, тот тамле ләтңыт блсыт: «Опам, щәщёквам, ащдйкам, анёквам ос



Е.Е. Симаков

сәлтатанув мәгыс ам номтумт акваг янытлахтуңкве патэгум. Ам бс тән хольтаныл блуңкве таңхёгум!»

Школа асламе юи-пәлт Виктор Николаев аквтох элалы касылын ялантас. Тувыл университетыт элалы ханищтахтас ос армиян лусытанкве ялыс. Вāt нупыл китыт тәлэ төвлум порат тав Камчатский край Мельково самын патум пәвлән минас. Тот «Сокол» намба каснэ колт нйврамыт товтыл хайтын касылын ханищтым рүпитанкве патыс. Пыг тәрвитың блупсал блнэ пыгрищит ос бвыл классыт ханищтахтын нйврамыт касылын ханищтасанэ. 2024-2025 тәлт Виктор ханищтамыла пыгыт бс хөнтлуңкве минасыт.

Вера Николаевна Николаева тох лавыс:

– Ам номтумт таи ёмас, Виктор ханищтамы нйвраманэн, акв пәвылын блнэ хөтпанэн, юртанэн ос аквьёт лусытам хөтпанэн номаве. Элумхөлас та мус блы, хотя мус тав мэхумн номаве.

«ЮграМераСпорт» мāt рүпитан хум Владислав Заикин потре щирыл, ты тәл округувныл пуссын аквьёт яныгсәт онтолов агит-пыгыт товтыл каснэ вәрмалың ёхталасыт.

Николай МЕРОВ



<p>Лүймә сәрипос (Северная заря) № 2 (1356), 29.01.2026</p> <p>Соучредители Дума, Правительство ХМАО – Югры</p> <p>Издатель Департамент внутренней политики ХМАО – Югры</p>	<p>Редакция</p> <p>ВРИО главного редактора – Рагимова Н.В. Телефон (3467) 33-17-52 (д 502)</p> <p>Заместитель гл.редактора – Кондина Г.Р. Телефон (3467) 33-17-52 (д 501)</p> <p>Ответственный секретарь – Ромбандеева С.М. Телефон (3467) 33-17-52 (д 507)</p>	<p>Адрес редакции и издателя: 628011, г.Ханты-Мансийск, ул.Комсомольская, 31 тел./факс (3467) 33-17-52 (д 510)</p> <p>E-mail: gazeta@khanty-yasang.ru Газета размещена на сайте www.khanty-yasang.ru</p> <p>Отпечатано: ООО «Печатный Мир. г. Сургут», ул. Маяковского, д. 14.</p>	<p>Индексы 04399, 54399 Тираж 1710 экз. Заказ 244</p> <p>Цена свободная Мнение авторов публикаций не обязательно отражает точку зрения редакции.</p> <p>Газета зарегистрирована Управлением Федеральной</p>	<p>службы по надзору в сфере связи, информационных технологий и массовых коммуникаций по Тюменской области, ХМАО-Югре и ЯНАО.</p> <p>Свидетельство о регистрации ПИ №ТУ 72-00795 от 23 января 2013 г.</p>	<p>12+</p>
---	--	---	--	---	-------------------